




H V N G A R I Æ
A L T E R A T A B V L A.

 VNGARIÆ hanc alteram descriptionem accuratiorem, vt nobis fidem facit clarissimus vir Ioannes Sambucus inde oriundus, (quisque enim, vt Plinius in opere suo Naturali verissimè testatur, eos diligentissimè situs diceret, in quibus ipse prodebat) primæ subiungere hoc in loco placuit, idque præter institutum: cùm singulis regionibus singulas tabulas tantum promiserim. Sed quia neutram satis pro regionis dignitate absolutam iudicauerim, vtramque in hoc Theatro proferre vtile duxi. Differre eas interdum in locorum positionibus, fluuiorumque flexuosis meatibus, conferenti apparebit: neque est quòd hinc statim Geographiæ ipsius veritatem quis eleuet; sed de ea existimet, vt Strabo rectissimè de Historia: is enim non statim eam abiiciendam censet, si, qui eam tradiderint, in locorū descriptionibus non consentiunt; quin imò nonnumquam vniuersæ historiæ fidem cōciliare ex ista dissensione licere docet. Vtetur itaque aut alterutra aut vtraque studiosi, in quorum gratiam id totum quod possumus, quando quod volumus non liceat, effundimus.